



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 7



Huawei CFO Meng Wanzhou chiokogo

India nung medical college 600 bosa nungdaker: Nitin Gadkari



VOL. XVIII NO. 344 (ADOK 344) DIMAPUR

AMUNGNÜ (SUNDAY)

RONGJUI (SEPTEMBER) 26, 2021

₹ 5.00

COVID-19 Nagaland: Kasasa dak putet; 1 asü

Kohima, September 25, 2021 (TYO): Nagaland nung Honibarnü nisung 34 dak COVID-19 putet aser aser 34 taneptsü angu.

"Testüiba ghonda 24 tsingda nisung 34 dak COVID-19 putet. Parnokji Dimapur nung 26, Kohima nung 6 aser Mokochung nung 2 lir" ta Integrated Disease Surveillance Project atema State Nodal Officer, Dr Nyanthung Kikon-ia shi.

"Kasa mapang COVID-19 puteta alir nisung 34 taneptsü angu. Parnokji Dimapur nung 30, Mokochung nung 3 aser Kohima nung 1 lir" ta paisa ashi.

Nisung 31,119 nungi 29,014 taneptsü nguogo aser ibaji 93.23% lir, ta Dr Kikon-isa ashi.

Tang nisung 465 anepaludar saka parnok rongnung nisung 365 dakbo shirangba yimya kecha mali, ta paisa shisem.

Honibarnü Dimapur nung COVID-19 puteta alir ka asü aser iba nisung züngsema tasür ajak agi 662 kümogo saka parnok 15 dakbo tanga tashidak liasü, ta Dr Kikon-isa metetdaksü.

"Hokolbar tashi nung nisung 682,943 nem COVID-19 vaccine indang dose 10,17,214 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,919, healthcare workers 15,995, arishi küm 45 ser temapur 197,283 aser arishi küm 18 nungi 44 tsingda alir 408,746 lir" ta paisa ashi.

"Vaccine agirtem rongnung nisung 334,271-i dose anaprong agiogo. Parnokji frontline workers 47,052, healthcare workers 13,238, arishi küm 45 ser temapur 132,713 aser arishi küm 18 nungi 44 tsingda alir 134,271 lir" ta Dr Thurr-ia metetdaksü.

Dimapur Police-i ozüing alema inyaksangshiba azüoker

Dimapur, September 25, 2021 (TYO): September 25, 2021 nü Commissioner of Police, Dimapur, Rothihu Tetso-i taoba ita asem tsingda Dimapur nung tatalokba indang osang metetdakja liasü.

Taoba ita pezü tashi Dimapur nung tansa junda dang aruogo. June 2021 nungi September 23, 2021 tashi police tsingdang ken o 65 benok aser iba dak sendakba nung nisung 94 apu, ta pai ashi.

Ita pezü tsingda Dimapur police-i prangpong 31, ammunitions 313, sen 1,28,790 (tashiyim agi saruba ta temolung malemba), grenades 5, detonators 16, cordtex wire 2 meters aser gari 5 apu, ta Commissioner Rothihu Tetso-isa metetdaksü.

2020 küm Nagaland nung ozüing alema inyakba ken o 1474 benokba nungi Dimapur nung ken o 827 liasü. August 31, 2021 tashi nung Nagaland nung ken o 941 benokba nungi 529 tashi Dimapur nung liasü, ta paisa ashi.

June 1 nungi September 23, 2021 tashi nung Dimapur police tsingdang IPC kübok ken o 219 dak sendakba nung nisung 158 apu aser special & local law kübok ken o 54 benokba dak sendakba nung

nisung 62 apu.

Kasa mapang NLTP Act/ D.C aser NTPS Act kübok ken o 26 benoka liasü aser item dak sendakba nung nisung 34 apu, ta Commissioner Tetso-isa ashi.

Dimapur Police-i tayongzükbä tulu ajurubaji tashiyim agi sen saruba aser tax meshiba inyakyim lir. January 1, 2020 nungi tenzüker ken o tem benokba rongnung 13% tashi iba dak sendakba liasü. Tashiyim agi sen meshiba, tax saruba, sen yong nisung apuba aser tanga ozüing alema mapatem azioktsü atema District Action Plan ka renemogo, ta paisa metetdaksü.

Külen, auyaba ken o tem benokba nungi 36% tashi two-wheeler auyaba indang liasü, ta paisa ashi.

"District Action Plan kübok transport trucks meinba dena lir anungji transporters temi mapang lateta aliba ama escort teyari agitsü mepishir" ta Tetso-isa ashi.

Dimapur Police indang teyari meshitsü aser tongteprateptsü atema:

Helpline number 7085055050/100
DCP (crime) M/No. 7085055006
DCP Zone-II M/No. 7085055003
DCP Zone-I M/No. 7085055002

NSCN-i Arunachal MLA 11 dang BJP sorkar meyaritsü tuyur

Guwahati, September 25, 2021 (Agencies): NSCN/GPRN-i Arunachal Pradesh kübok Tirap, Changlang aser Longding district tem nungi MLA 11 dang Pema Khandu-i aniba BJP sorkar nung madentsü tetuyuba agütsüogo.

"India sorkari Arunachal Pradesh state nung Naga nung aliba tesemtem nungi 'NAGA' ta asüba olong samatsütsü merangba khukhua aitsür" ta NSCN/GPRN-i metetdaksü.

"India sorkari Arunachal sorkar aser ochimashiba Naga nung kar den yaritepa 'Any Naga tribe' aser recognised Tangsa, Tutsa, Nocte aser Wancho agientsü mapa inyaker" ta parnokisa ashi.

"Iba ya Naga yimten tebilemstü atema inyaka aruba mapa mezüngmeshiba inyakyim ka lir. Iba ajanga India sorkari Naga nung temeten, maitsü aser putiotsü hao ta maliba sayur" ta NSCN/GPRN-isa metetdaksüogo.

Naga nung küm mevirjang aika

tang state ta ajaba Arunachal Pradesh, Manipur, Nagaland aser Assam den Eastern (Myanmar) nung liyonga arur. British nungeri Naga nung lima nung tetsüing majemok tashi Naga nungeri bendanger tashi memetet liasü aser 1830s tetenzüklen tashi pei linük kümzüka ayutsü atema rarayonga aru, ta parnokisa ashi.

1947 küm British nungeri toktsür aoba sülen India aser Burma linüktemi tashiyim mapa inyak Naga linük atsünga agi aser idang nung jagi tenzüka tanü tashi rarayonga arur. India-i UN Security Council bangzüing alema Naga nung nem temeten magütsür, ta NSCN-isa ashi.

"NAGA" ta asüba olong ajanga Naga nung ajak sendaktepa lir aser onoki ibaji kodanga metoktsütsü. Naga kin shiai iba ama telemsa adokdaksüba inyakyim anema noktaksü. Ozüing alema yangluba bill pusemba Naga MLA tem aser lennirtem tebilemstü khuret abentsü aser parnok dang anti-Naga ta ajatsü, ta NSCN/GPRN-isa metetdaksü.

Dimapur Ao Lanur Telongjem (DALT) office mesemtetogo



Honibarnü Dimapur Ao Lanur Telongjem (DALT) indang office mesemtetba sentong nung tajungshi o jembir Wb. Limasunep Jamir, IPS, mendenpurtem aser züngsemtem külemi agiba noksa angur. (Dimapur, September 25)

Dimapur, September 25, 2021 (TYO): Honibarnü Wb. Limasunep Jamir, IPS, IGP (Range) Nagaland-i Dimapur Ao Lanur Telongjem (DALT) indang office mesemtettsüogo.

DALT indang office ya Hotel Saramati & AKTD Park, Super Market, Dimapur anasa lir.

"DALT tenteter küm 9 tashi lia arudang lokti atema mapa tajung jenti inyaka arur aser iba telongjem ya meraksai dang aotsüla" ta Wb. Limasunep Jamir-i office mesemtetba sentong nung jembidang ashi.

"DALT indang office lapokba ya telok tejakleni aoba tamaitsü ta angateta maneni tajungba inyaka aotsü merangang. DALT tashi tait kümogo anungji iba tashiji timi tebilemstü bena amshitsüla. DALT-i Dimapur nung Aortem atema dang masü saka Naga nung ajak asoshi

ochi aser temeten atema maneni inyaka aotsü ayongzüker" ta pai ashi.

Wb. Limasunep-isa yimtsüing nung mopu lemsaba nung ajemdaker olen ka jembidang "yimdak mopu ta ajaba tera ya bushia ora temopu nung ajemdaker ajaba lir aser ibaji nisung tejak masü saka temopu repranga libaliroba indang tetezü lir" ta ashi.

"Anungji Dimapur nung aliba Aortemi tejak mereprangi kati ka atema aria bilema aser akhümtsübutepa yimdak mopu ka ama longjemer alitsüla" ta pai ayongzüker.

Dimapur nung alitsü ya kanga tasak kümogo aser syndicate system ajanga nüboritemi khuret jenti ajurur. Asenok tetsüba tia ka nung alir saka tasü aittsü nungdaker aser asenok longjemra tasü aittsü. Anungji DALT lennir

ser Dimapur nung Aortem longjemtsü asoshi inyaksüla, ta Wb. Limasunep-i ayongzüker.

"Lennir ka dak taremzüker shisatsü alitsüla, tangar akhümtsübutepa, khuret abentsüla, tangar den asüingdangyatepa telemtetbatem agitsüla, aria bilemstüla aser masü ta asüba nungbo akangakanga anema noktaksüla" ta paisa ashi.

Wb. Limasunep Jamir-i tajungshi o jembiba tembanga 1 Peter 5:5-7 zünga Dimapur nung Aor lanurtem moatsü.

Iba sentong nung mendenji DALT Tatong Tir Tiatemu Longchar liasü, Dimapur Area Ao Pastors' Fellowship Secretary, L Panger Jamir-i Lai zünga sarasadem, DALT Tir Aotemu Aier-i tesentepertem pelaa agizük aser DALT Tongti Tezüler S. Pangertoshi-i o semlok jembir.

Nagaland nung mezüngbuba In-service Teachers Training Institute lapoktsü

Kohima, September 25, 2021 (TYO): Nagaland nung mezüngbuba In-service Teachers Training cum Examination Centre ka Dimapur district kübok Pherima nung yanglutsü.

Iba mapatong ya DoNER-i Rs 15.5 crore teyari agüja yanglutsü aser tanü Union Minister for Tourism, Culture and DoNER G Kishan Reddy-i centre lapoktsü atema lung azüingtsüogo.

"Tesayurtem ya linük tarutsü yangertem lir aser parnok classroom nung sayuba ajanga linük nung tarutsü lennirtem anitetsü" ta tanü Union Minister Kishan Reddy-i ashi.

"Kaketshirtem atema school lapoker aser tang tesayurtem tajungba kümdaktsütsü atema centre lapoktsü sentong atongba atema pelar. Iba mapatong ajanga tesayurtem kanga ajangzüksü imlar" ta paisa ashi.

"Iba centre lapokba alizüingji tesayurtem dang school nung bentshitsu tema tesayuba balala agütsütsüba lir. State sorkari iba kaketshirtem aser tesayurtem ajangzüksü atema iba mapatong tongti süa inyaksü imlar" ta Reddy-isa metetdaksü.

"Prime Minister Narendra Modi lenisüba kübok Centre-i küm 33 lir külen New Education Policy benokogo. NEP ajanga professional institutes nunga lisopur oshitem dendaktsütsü aser sobaliba o inyaksangshi kümzüka ayutsü" ta paisa ashi.

"Modi'er sorkari North East nung 100 percent literacy rate

tongdaksünür aser NE state sorkartemi iba tayongzükbä atema inyaksüla. Asenok shisaliok nung temolung kanga agütsütsü tim kechiyong shisaliok medeni state mesüra linük ka tejakleni maotsü" ta Union Minister-isa tayongzükbä agütsü.

"India sobaliba nung tesayurtem akhümtsübutepa aser tushir. Guru aser Philosopher ama parnok züngshir anungji training centres ajanga tesayurtem ajangzükra, iba ajanga loktiliba ajangzüksü" ta Reddy-isa metetdaksü.

Paisa Northeast nung ali rongsen alibatem bushia mapa inyakkad adokdaksütsü aser tejakleni aotsü atema nenshia ashi.

Centre-i Food Security Scheme ajanga Covid wara mapang jang seret nung Rs 3 agi agütsür aser BPL kibongtem nem angati agütsür. Iba inyakyim ya taküim November tashi inyaksü. Centre-isa women Self Health Groups nem senotsü teyari agütsütsü, ta Union Minister Reddy-i ashi.

Taküm financial year atema Centre-i NE state tem nung terenlok mapa inyaksü atema Rs 67,000 crore lemjüka lir aser DoNER Ministry-i akokba tashi North East region renloksü atema yaritsü, ta paisa metetdaksü.

"Centre-i NE nung air, rail, road aser IT connectivity tajungba kümdaktsünür aser tourism infrastructure renlokdaksünür" ta Reddy-isa ashi.

Planning & Coordination, Land Revenue and Parliamentary Affairs

Minister, Neiba Kronu-i Union DoNER Minister, Reddy dang In-service Teachers Training cum Examination Centre yanglutsü lemzüksüba atema pelaba metetdaksü.

"Centre sorkari yangluba New Education Policy ajanga education system nung temelenshi aika bentsür aruogo aser iba ajanga tesayurtem tajungba akümtsü nungdaka kümogo" ta School Education Advisor, KT Sukhalu-ia ashi.

Nagaland nung iba ama reju maliasü saka DoNER Ministry-i iba reju lapoktsüba agizükba atema pelar, ta paisa metetdaksü.

Nagaland state-i senotsü peria mangur aser iba jagi state-i lemzükbä Rs 4.5 crore jia magütsütetsü anungji iba mapang atema Rs 20 crore agütsütsü atema mepishir ta Advisor Sukhalu-isa DoNER Minister Reddy dang ashi.

Sentong nung Local MLA aser Sericulture, Excise and Minority Affairs advisor, Zhaleo Rio-ia tetsükdaksü kecha melii iba mapatong inyaksü nangzüker.

Paisa Pherima village council-i shidi züluba ka agütsü. Iba shidi nung dang In-service Teachers Training cum Examination Centre ajanga National Highway-29 den sendaktepa lenmangji bye-pass road ka ama kümdaktsütsü shia lir.

Union Minister Reddy-i anogo ananü atema Nagaland semdangdang DoNER Joint Secretary Anuradha Sharma Chagti aser tanga DoNER ktdangsurtemi pa meina aru.

Union Minister-i lenmang atema commemorative plaque sayatsü



September 25 nü Sovima süngküm nung Culture, Tourism & Doner Union Minister, G. Kishan Reddy den Dy CM Nagaland, Y.Patton aser tanga ketdangsürtem lenmang project atema plaque sayatsüba sentong nung tangokba noksa nung angur.

Dimapur, Rongjui/ September 25 (TYO): Culture, Tourism & Doner, Union Minister G.Kishan Reddy-i September 25 nü NH - 29 (Sovima yimtsüing among nungi Thahexhu yimtsüing tashi) nung commemorative plaque ka sayatsüogo

Nagaland State Cricket Stadium, Sovima nung sentepa aliba lokti den o jembiba mapang Reddy-i, iba lenmang ya by pass lenmang ka ama Dimapur yimti atema kanga tongtibang lir aser iba ajanga Dimapur yimti main road nung gari senzüsening nung tetsükdaktsü adokba tajemba kümdaktsü aser tesem balala tsüingda lokti libaren aser shishilembaba tsüsü tajangzük agütsüsü, ta ashi.

Kohima aser Dimapur na tsüingda tang yanglua aliba lenmang indang jembiba mapang, Reddy-i lenmang ya takaratiba nung yangluzüktsü merangtsüla ta ashiba den ketdangsürtem dang lenmang takaritiba nung yanglutsüsü mepeshia liasü. Kasa mapang nung India sorkari senotsü teyari agütsüsü renema lir ta pai ashi.

1 Naga girls NCC Battalion-i Rusoma yimtsüing semdang

Dimapur, Rongjui/ September 25 (TYO): 1 Naga girls NCC Battalion nungi cadets temi September 24 nü Rusoma yimtsüing semdanga liasü. Parnoki nüburtem atema Govt of India Welfare Scheme balala agütsüba indang metetdaktsüsü aser tzü mopung



National Legal Services Authority (NALSA) akhüm nung Ao Kaketshir Mungdang (AKM) den külemi yaritepa Mokokchung district legal services authority (MDLSA)-i legal awareness sentong ka AKM conference hall Mokokchung nung ayongzuka akaba mapang shisalen sayurtem den AKM ketdangpur aser shilem agia adenertem külemi tangokba noksa nung angur. Iba sentong nung shisalen sayur panel Lawyer - Tajungla Longkumer, Mapujungla Pongen aser Purnungsang Jamir par aseme social welfare schemes, RTE, Lok Adalat, health & family welfare schemes, national food security act aser domestic violence act onüktem ajemdaker jembia liasü. Mokokchung, 25th September, 2021

"Iba lenmang ajanga Nagaland nung temelenshi bener arutsüsü," ta Doner Minister-i ashi.

Paisa, infrastructural tajungba akümba aser resources aser terenlok maparen timba küma aoba ajanga Nagaland-i alima penzürtem tali arutsü, kechiyong Nagaland ya tebur tajung lima ka aser sobaliba kanga takar lir, ta ashi.

Sobaliba, oshi, tesem aser state balala asütsü akok ajisüaka asenok ajak ka dang, linük ka dang aser asenok ajak Bharat jabsotem ta ashiba den Narendra Modi lenisüba nung sorkari NER nung infrastructure ajak renloka odaktsüner, ta ashi. Iba dak sendakba nung pai, sorkar den sensak asemtsü aser iba tesem terenlok asoshi teka amteper inyaktsü ayongzük. Paisa, sorkari GOI scheme tem ajak bendanga agüja benoka inyaktsü, ta tenangzükba agütsü.

Sentong nungsa Deputy Chief Minister aser Minister incharge Home and R&B Nagaland, Y.Patton-i, Nagaland nung senzüseningtsü aser

tesendaktep atema lenmang dak alaka tanga lenmang kecha mali aser lokti libaren aser rongsenketsüing terenlok atema lenmang infrastructure dak dang metaloker ali ta ashi.

Paisa, Doner Minister dang state nung Tourism, Trade, Industry aser tanga lenla balala nung terenlok atema lenmang infrastructure yanglutsü aser ajungkettsü nüngdaker aser iba atema Ministry of Doner teyari nüngdaktsü ta ashi. Iba dak sendakba nung pai Union Minister dang state nung lenmang ajunga yangluma linük nung tanga state tem den jangyumedema matu tashi NESIDS ajanga senotsü teyari agütsüba maneni atatsü mepeshia metetdaktsü.

Kasa mapang nung Chief Engineer PWD (R& B.) Er. Kahuli Sema-i iba project indang technical report agütsü.

Iba sentong ya Principal Secretary, Works and Housing department, Menukhol John lenisüba nung agi aser Secretary, Works & Housing department, Kevekha Kevin Zehol, NCS-i tepela anküp o jembia liasü.

wakzuka ayuba tajangzük indang rasaa ashitsü atema iba yimtsüing semdanga liasü.

Cadet temi bendanga agüja inyakba atema Rusoma Village council-i parnok dang kanga pelaba lemsatepogo aser item osangtem parnok anogoshia inyakyim nung benoka inyaktsü

tenangzükba agütsü.

Lokti ajangzüktsü atema NCC cadets temi terenlok maparen balala benoka inyakba atema yimtsüing head GB-i parnok dang kanga pelaba lemsatepa liasü, PRO (Def) Kohima, Lt Col Sumit K Sharma-i sangdong ka ajanga metetdaktsü.

Esther tepsetsang pua bener aruba asoshi tenüngsang agütsür

Mokokchung, 25 Sep (TYO): Esther Phom tepsetba maparen dak sentakba nung Chuba Chang NPS, SDPO (Hq) Mokokchung pa lenisüba nung SIT teloki mapang magii tekaratiba nung aibelensang pua bener arutetba asoshi Phom Union Mokokchung aser Phomla Hoichem Mokokchung Unit nati yokba sangdong nungsa shia liasü. Ozüing amertemi aibelensangji ozüingi melaba ama tapet temerenshi agütsütsü asoshi akanger, ta parnokisa metetdaktsü.

Aowati S/o Lt. Pangjungmanen (Molungkimong village)-i 13th September, 2021 nü taochi makai nisung tepsetba asoshi kukua aitsür, ta Phom Union Mokokchung aser Phomla Hoichem Mokokchung Unit nati yokba sangdong nungsa shia liasü. Ozüing amertemi aibelensangji ozüingi melaba ama tapet temerenshi agütsütsü asoshi akanger, ta parnokisa metetdaktsü.

Bhandari District jenjangi ajungkettsüsü maneni akhanger



BDDC ketdangsürtem aser Lotha Lower Range CSOs ketdangsürtem tangokba noksa nung angur.

Dimapur, Rongjui/ September 25 (TYO): September 25 nü DBSS Hall, Bhandari nung Lotha Lower Range, CSOs consultative Bhandari ADC Hqsya District jenjangi ajungkettsüsü atema maneni akhangtsü bangjemogo.

tesem terenlok aser yimjiyimjung atema Nagaland state sorkar dang parnok takhangba takaratiba nung asadangtsü mepeshia senden amenba mapang, metetdaktsüogo, kechiyong state sorkari 1983 küm "backward area" ta sangdongba sülen tanü tashi rongsenketsüing aser terenlok maparen balala nung iba tesem atsüingzuka lir.

Longleng nung District level Consultative senden menogo

Dimapur, Rongjui/ September (TYO): Panel for Review of Communitization of Public Institution & Service Act 2002, district level consultative senden ka Septemeber 24 nü DC conference hall Longleng nung menogo.

ashi. Maneni Banuo Z Jamir, IAS (Rtd)-i, bushisüingdang atema yangluba questionnaire tem line departments ajak nem agütsü aser parnok dang ken o junga asadanger parnok tebilemba lemsateptsü aser questionnaire tem October 15 matong tsüingda benoktsü metetdaktsü. Mendenbula den panel for review of Communitization of public institutions & Services Act 2002, Member Secretary John Lohe aser tanga ketdangsürtemi iba senden nung shilem agi.

Panel for Review of Communitization of Public Institutions & Services Act, 2002, mendenbula Banuo Z Jamir, IAS (Rtd)-i, iba sentong nükjidongji Communitization ajanga terenlok maparen nung temelenshi bener arutsüba jangjatsü atema lir, kechiyong sorkari küm 20 dak tema iba inyakyim ya lepa merprangshiteti aruogo, ta ashi. Laisa, line department ajak dang sectors ajak nungi mapa junga inyaba aser minyakba yimtsüingtem shimtsü metetdaktsü, ajita asünung dang parnoki pei tata tesemtem nung ken o tajungba asadangtetsü, ta

Iba senden ya Longleng Deputy Commissioner M. Shayung Phom lenisüba nung agi aser District Administration, Schools Education, Health & Family Welfare, Power, Social Welfare aser Rural Development nungi ketdangsürtemia shilem agia liasü.

DEF Kohima-i nisung tenüng ka Metongshitsü

Dimapur, Rongjui/ September 25 (TYO): September 25 anepdang osang kakat balala nung North PS ken o ka nung Lhoulietuo Kire (50 yrs) apuba aser ano ken o nung aija alir Zelhoulie Kets (51 yrs) bushiba indang osang ka

sangdongogo. Iba dak sendakba nung jenshia alisang tenüng Zelhoulie Kets ya osang kakattem nung sangdongba ama masü saka Zelhoulie Mets ta metongshir agitsüla, ta DEF Kohima, PRO sangdong ka ajanga metetdaktsü.

Mizoram nem RT-PCR mobile vans 2 agütsütsü

Aizawl, September 25, 2021 (Agencies): Centre sorkari Mizoram nem RT-PCR facilities aliba mobile vans ana agütsütsü ta Mizo National Front (MNF) party ajanga metetdaksü.

Hokolbarnü Lone Lok Sabha MP C. Lalrosanga aser Officer on Special Duty (OSD) to the chief minister Rosangzuala nati Delhi nung Union Health Minister Mansukh Mandaviya den ajurutep.

Iba mapang Union Minister-i tena dang Centre-i RT-PCR mobile van (Infectious

Disease Diagnostic Laboratory, I-LAB) ana agütsütsüba ashi.

Chief Minister Zoramthanga aser state health minister Dr. R. Lalthangliana nati mepishiba ama Centre-i ventilators aser ICU-related equipment talila agütsütsü ta Union Health Minister-isa tena dang metetdaksü.

Hokolbarnü Mizoram nung nisung 1,257 dak Covid-19 aliba puteta liasü aser parnok züngsema nisung ajak agi 85,366 kümogo.

Tang tashi nung COVID-

19 ajanga nisung 285 süogo, ta state health ketdangsür kati ashi.

Yashi puteterem rongnung tanur 252 aser Border Security Force (BSD) jawan ka dena lir, ta paisa ashi.

Mizoram nung tang nisung 14,997 anepaludar aser 70,084 tashi taneptsü nguogo.

"Brihostibar tashi nung nisung lakh 6.76 tema nem vaccine agütsüogo aser parnok rongnung nisung lakh 4-i dose anaprong agiogo" ta state immunization officer, Dr. Lalzawmi-ia metetdaksü.


Venkaiyah nem Lokapriya Gopinath Bordoloi Award agütsütsü

Guwahati, September 25, 2021 (Agencies): Assam sorkari India Vice-President M Venkaiah Naidu nem Lokapriya Gopinath Bordoloi Award agütsütsü telemtetba agiogo.

Naidu-i National Integration aser National Contribution nung shilem agiba atema iba sempet agütsütsü.

October 3 nü Naidu-i Assam semdangi arudang sempetji agütsütsü ta Assam Cabinet-i lemtet.

Lokprika Gopinath Bordoloi ya nüjiso atema rarar ka liasü aser India nüjiso anguba sülen Assam nung mezüngbuba chief



minister inyak.

Küm ana shia agütsüba Lokapriya Gopinath Bordoloi

Award nung Rs 2 lakh agüja aru saka sorkari Rs 5 lakh kümüsügo.

Lokprika Gopinath Bordoloi dang modern Assam indang architect ta ajar. 1999 nung pa nem Bharat Ratna agüja liasü.

Chief minister Himanta Biswa Sarma menden ser Assam Cabinet-isa state nung civilian awards nungja melenshitsü telemtetba agi.

Tang nungi Assam Ratna award dang Asom Baibhav, Assam Vibhushan dang Asom Saurav aser Assam Bhusan o Assam Shree award dang Asom Gaurav ta ajatsü.



Assam Chief Minister Himanta Biswa Sarma-i Union Minister for Petroleum Hardeep Singh Puri pela agizükdang sempet ka agütsüba angur. Guwahati nung 'E&P Investment Opportunities in Northeastern Region' indang sentong ka agidang Union Minister Puri-i Indian Oil Corporation Ltd (IOCL) indang Digboi refinery tuluba akümsü molunga agizük. (Guwahati, September 25)

CM special vigilance cell-i nisung 10 apu

Guwahati, September 25, 2021 (Agencies): Assam Power Distribution Company Limited (APDCL) nung sen yong mapa agütsüba ken o dak sendakba nung Chief Minister Special Vigilance Cell-i nisung 10 puogo.

Hokolbarnü CM's Special Vigilance Cell-i Guwahati nung tesem pezü mita aodang nisung 10 tashi apu.

Guwahati kübok Jalukbari nung nisung pezü, Chandmari nung ka aser Dispur nung ana

apu, ta ketdangsürtemi ashi.

CM's Special Vigilance Cell-i apurtem rongnung APDCL OSD Dipankar Dhingiya dena lir.

2006 nungi Dipankar ya APDCL nung officer on special duty ka ama inyaka arur.

Külen, Assam sorkari Assam Power Distribution Company Limited (APDCL) mapa nung aniokba inyakim thinenogo.

"Tekaratiba nung recruitment test tasen agitsü" ta Assam chief minister Himanta Biswa Sarma-i ashi.

DNLA tanishirtem temai adokogo



DNLA tanishirtem temai adokogo

Guwahati, September 25, 2021 (Agencies): Ozüngi noktanga aliba Dimasa National Liberation Army (DNLA) telok nungi tongti lennirtemi sorkar den olemteptsü atema temai adokogo.

DNLA chairman Edika Diphusa (Kharindao Dimasa), deputy chairman Juddychan Haflongbar (America Dimasa) aser general secretary Prithamjit Jidongsa (Galao Dimasa) nungertem temai adok.

DNLA-i ceasefire alitsü osang sangoktsüba sülen hopta ana shi lir parnok temai adokogo.

Karbi Anglong district kübok Dhansiri nung Assam Education Minister Ranog Pegu, Special DGP (Law and Order) GP Singh aser ADGP (Special Branch) Hiren Nath nung den police aser CRPF ketdangsürtemi parnok pelaa agizük.

"Asenoki dang meranga inyakra yimjung angutsü. Assam kübok hill district tem nungi Dimasa National Liberation Army (DNLA) telungpur teloki tanü temai adokogo. Onoki parnok den yimjung olemteptsü aser teti atema telemtetba ka agitsü pelashishia agizüker" ta Pegu-i metetdaksü.

DNLA ya 2019 küm tetenzüklen Dimasa linük balaka kümteptsü alizüng yur tentet. Parnoki Assam kübok Karbi Anglong aser Dima Hasao district tem nung mapa inyaka aru.

September 7 nü DNLA-i ita asem atema ceasefire alitsü osang sangokja liasü. Taküm August 27 nü Dima Hasao district nung nakmati abenba truck gari driver pungu tepsetba nung DNLA telungpurtem dena liasü ta tai tonglokja lir.

Congress-i Tripura president atema Birajit Sinha shim

Agartala, September 25, 2021 (Agencies): Congress President Sonia Gandhi-i Hokolbarnü Tripura nung Congress party President inyaktsü atema taoba Minister Birajit Sinha shimogo.

Sonia-isa Triprua nung Working Presidents pungu shim.

Ajisüaka, committee tasenba nung taoba state President Pijush Kanti Biswas nem shilem kecha melemzüksü.

August 21 nü Biswas-i

party president menden nungi sodi agia liasü. Party high command-i mepishiba ama pai sodi meshi.

Arishi küm 69 tain Sinha ya Congress-i aniba Tripura sorkar nung Minister liasü. Taoba mapanga pai state party President kümsük anaben inyakogo.

"Congress interim President Sonia Gandhi-i Tripura atema Working Presidents 5 shimogo. Parnokji Mohammad Billal Miah, Professor Manik Deb, Sushanto

Chakraborti, Purnita Chakma aser Dr Pradip Bardhan nung lir" ta All India Congress Committee General Secretary, K. C. Venugopal-i metetdaksü.

Tripura Pradesh Committee nungsa Vice-Presidents 10, General Secretaries 18, Secretaries 29, members 16 aser treasurer ka shimogo.

Maneni, taoba Chief Minister, taoba state party President tem aser lennir tejentem dena nisung 35 agi akümba executive committee ka tentetogo.



Hokolbarnü Arunachal Pradesh nung National Socialist Council of Nagaland-Khango (NSCN-Khango) züngsem kati Assam Rifles Khonsa Battalion aser Tirap Police tsüngdang temai adokba sülen agiba noksa angur. Iba nisung ya NSCN-Khango assistant political officer Wanghong Ngowa ta jangjaogo.



TIR YIMYIM YIMOBILEM (EDITORIAL)

DIMAPUR AMUNGNÜ, RONGJUI (SEPTEMBER) 26, 2021

Yisui sarasademtsür

Khristan taküm ka nung teti tatidang lir. Aji oda, Khristan taküm kaji temalen sang aser telonglen tatidang agi meketbanga lir ta asenoki ken nung atener. Yisui taküm alidang pa nütüsung rongnung Pai Peter dang kanga meim. Kenü anogo Pai Peter dang ashi, 'Simon, Simon, ajiang, Satani tsük ama sepdoktsü asoshi na agitsü mepishir, saka nü tamang tamakok mangutsü asosh ni na asoshi sarasademtsür, anungji na kodang tanaben temulung meya arudir, idangji nü adianutem tashi itdakang." Luke 22: 31 nung iba tatalokba ya asenoki angutsü. Yisui kangkidong nung metatsü asoshi mapang nenjunga arur ta Pai meteta dang liasü. Yisui pa kodang, kong shibai ashioktsü aser koma timtema reshikangshi ajurutsü, Pai meteta dang liasü. Iba ama shisabolu mapang nunga Pai Peter tamang nung akangshidaktsü. Peteri taonung mesüra asung parnok dak kechi ataloktsü memeteti liasü, saka pa Kibuba Yisui Satani pa atidangtsü aser pa yangji tsüktsü ta meteta dang liasü. Iba jagi pai Peter dang Satani na atidangtsü asungdang, anungji kümdanga saksalema liang, maneni sarasademang aser na kodang tatidang nung tsükdir, idangjisa ano na temulung meyipa arua nür medemer aser adianu tamang nung tashi itshidakjang ta lendong aser tatidang agi parnok tonga marudang shiadoker liasü. Na atidangtsü Satan renema lir saka na tamakok mangutsü asoshi aser teti taküm mesamatsü atema ni tebu dang sarasademtsür ta Yisui Peter dang ashiba o ji asenok atema tanüa tashi tasen angudak aser tejenokdak tajung ka lir. Peteri pa atidangtsü Satani renembajia memetet aser pa tamakok maludaktsü atema Yisui pa asoshi sarasademtsübai pai memeteti liasü. Asenok Khristan takümji yamaji lir. Khristan-temji asenok lir aser Satan mapaji asenok atidangtsü aser asenok mashileni anisatsübai lir. Ajisüaka, asenok tasü aitsü aser temulung alemdak ka lir, aji Yisui teti asenok atema tebu dang sarasademtsür ta asenoki bilemtettsüla. Tatidangji temenen masü saka tatidang nung tsüker temulung meyipa marutetbajang temenen asütsü. Yisui Peter dang ashibaji jungjunga bilemdangra, Satan ajanga pa dangi tatidang arubaji pa tamang nung akangshitsü aser par adianu tashi itshidaktsü asoshi liasü. Aji oda, kodang Peter tatidang nung tsüker külen pai asüktema jepa temulung meyip, iba sülenbo pai Kibuba Yisui dang nangzükba ama Yisui asoshi pa taküm agütsütsüa metsübai aküm. Aiben asenoki taküm nung tatidanga asenok dangi dang arur aser asenoki dang ajurur ama bilemer. Asenoki aiben tatidang nung tsükba joko kodanga mesaktettsüa maksü ajuru ama bilemer. Iba jagi, asenoki temulung memeyiper. Itemji satani tsüksü ama sepdokba purtem lir. Ajisüaka, Yisui nai ajurutsüba tatidangji nai majurudangi meteta dang lir aser iba tatidang nung tamakok mangutsü asoshi Pai Peter atema sarasademtsüba ama na atema sarasademtsür. Aji oda 1 Korint 10: 13 nung ashir, nai mekoktettsüa tatidang marudaktsütsü aser tatidang nungi jenbuttsü lenmang renemtsütsü. Iba dang nungi teyari tuluba kong nungi arutsü asenoki imlar. Kodang tatidang arur, asenok atemabo ajungbena asütsüa akok saka ibaji aseni majurudang iba tatidangji akoktsü atema Yisui na asoshi sarasademtsüogo ta nai bilemang. Rom 8 :34 nung ashir, " Yisui asenok asoshi mepishitsür." Ajisüaka, Yisui mepishitsüba ajanga asenok tatidang madak takok angubaji tatemang masü, saka Tsüngremer nükjidong ka lir, aji asenoki asen adianu tashi itshidaktsütsüla. Tetezü asenok tebok sünga alibaji teperi masü, asenoki anguba takokji tatemang masü aser asenok temulung meyipbaji asen kija anisungzüka alitsü asoshi masü, saka asenoki anguba takok aser temoatsü jagi tangar tashi itshidaktsütsü asoshi lir. Yisui asen atema sarasademtsübai ibaji atema lir. Ibaji mamadokli.

OLEMSABANG

Arogo, Tenzükba Mapa Aser Temeshi Lai

~ Rev. Dr. A. Tali Ao, CTC

Yanglushi Sensaksem Sabang (YSS) nung züngsem asüba maongka ya-a ulura ta alinung ano onük jembitsü yimli agütsü nung pelashishia agüja aliba onük nung bilemdangtsü asoshi olen kar lemsateper. Agüja aliba onükji asen nüberi kanga sapuba onük aser maparen ka lir. Asen nüburtemi arogo meimba, arogo tenzükba nung shilem aginüba, arogo tenyaba aser tenzükba asoshi tenla tajung agütsüba, arogo den sendakba tentet ABAM, AIM, CTC, yamala aika, mulungsoa nungitba angudang kanga pelar aser Tsüngrem tenung asanger. Anungji item nübu, shisatsü, tangatetba, sempet, aser rongsen timi ketdangsüa Tsüngrem sentsüwangshi, nüburtem tekümtet, tajangzük aser alima rangpen yimjung aser tesünep asoshi ketdang asütsü asoshi asenok ajak khuret lir.

Arogo

Khrista Yisui ajanga Tsüngremi jatetba nüburtem dangji ekklesia ta Tasen Lai nung shi lir (Mati 16:17; 18:17; T. Mapa 5:11; 7:38; 8:1, 3; Rom 16, 1,4,5, 16, 23; 1 Korint 1:2; 4:17). Iba ya Greek aser Rom yimden yimli aser sobaliba nung amshiba ojang ka Tasen Lai zülurtemi apuzüka amshiba lir. Greek aser Rom yimden yimli lokti tentet nung ekklesia, English nung assembly, koba nung tetsürtem, lanurtem, tanurtem, ainer, sensaker, lemtalutar metendaktsü, saka tebur senso, takar aser tashitemeteterem dang züngok. Anungji Greek aser Rom nungeri ekklesia ta ajaba dang nungi Tasen Lai nung ekklesia ta amshiba tetezü aser tangatebaji kenyonng balala lir. Tasen Lai nungbo ekklesia ta asüba nungji Yisui tenung nung amanga tzu nung tüzenerem ajak tetsür, tebur, tanur, tain, takar, sensaker, bendanger, alar, kilir, semloka alir, matamapensar, lemtalutar, Yihuda nunger, Samari nunger, Greek nunger, Rom nunger oda kin, kidong, oshiben balala ajak züngok. Aser parnok ajak saku aser kasa maongka aser yimli, tim temeten, agütsü. Anungji arogo, koba dang Lai nung ekklesia ta aja ibaji Greek aser Rom yimli nung ekklesia dang nungi kanga tepila tulu lir. Tasen Lai nung ekklesijai radical democratic assembly of equals lir.

Pauli Galatia 3:27-28 nung ashiba ama, "Kechiyong nenok shirsa Khrista nung baptiogo, nenok Khrista dak sübuogo. Yihuda nungera masü, Grik nungera masü, alara masü, nüjia masü, tebura masü, tetsüra masü, kechiyong nenok ajak Khrista Yisui nung ka dang lir. Aser nenok Khrista nung ka dang lir. Aser nenok Khrista nüburti süra ajangla nenok Abraham semchirtem lir aser tenangzükba amato nenok senmangertem lir."

Ano Tasen Lai nung kanga sapua amshiba kaji arogoji nisung temang (body) ka den medamdanga lir. Kechi koda temang nung tenüktelen balala Tsüngremi shimteta ayu yamaji arogo nung tenüktelen ajakji Pai shimtet (1 Korint 12:1-31). Mezüng Korint 12 nung "temang" ta aiben shia lir aser iba jagi amangbapurtemji organically sendaktepa lir ta sayur. Yangi tekolakji (12:21) tanga temang shilem den tuluba mesüra temaba masü saka tanga temang shilem den saku aser ajakji kati ka dak metaloka lir (interdependent) ta sayur.

Ano arogoji "Khrista Temang" ta shia lir (Kol 1:18, 24; Eph 4:12; 5:23). Tetezü arogoji tenüktelen balala aika agi aküm aser shilem shaji tongtibang maparen lir, aser maneni anir (Eph 4:12-16). Khristaji iba temang kümzüksang/tekümzüker aser temang nungji pa tekolak lir (Eph 1:22-23). Khristaji amangbapur shia madak tekolak aser Kibur lir aser arogo, ekklesijai pa temang lir. Khristantemji Khrista mang lir (Rom 12:4, 5; 1 Cor 6:15; 10:16, 17; 11:27; 12:12, 27).

Arogo nung Tenzükba Mapa

a) Tenzükba Mapa nung Khrista Tatishitsü

Arogo nung tenzükba mapa nung mezüngbuba nükmenji Yisui Khrista taküm lir. Pai kechi mapa inyak aser koma inyak yangji tenzükba mapaji amendaka lir. Arogo nung mapa tulu aser aika inyakaka Pa dak nungi pila ora ibaji meimchir sangrasangji tenzükba mapa ka dang asütsü. Yisui taküm aser pa jaklaliruji arogo, ekklesia tenzükba mapa asoshi tatishitsü tuluba aser tematiba lir. Arogo nung tenzükba, lenisüba, temeim mapa inyakba, teyari agütsüba, taneptsü mapa inyakba ano yamala aika, ajakji Yisui inyakba ama inyaktsüla. Iba ya angatettsü asoshi Mark 10:45 nung Yisui ashiba oji kanga tongtipang lir. Pai ashi, "atangji Nisung Chir-a sünga pei tenzükdaktsütsü atama masü, saka tenzüktsü aser aika alang pei taküm agütsütsü aru."

Iba yagi Yisui sayuba aser mulungba tenzükba mapaji Yihuda nunger, Greek nunger aser Rom nunger yimsüsürtem, lenirtemi inyakba dang nungi kanga balala aser tepila lir ta sayur. Yisui kilir aser alar ka ama nütüngtem tetsüng shidoktsüba jagi pa tenzükba mapaji kilir aser alar mapa ama lir ta tatishitsü sayuba lir. Iba ya pa sülen anidakertem ajaki iba amaji inyaktsü asoshi tatishitsü ka doktsüba lir (Yohan 13:14-15). Arogo nung kechi tenzükba mapa südir süaka iba tatishitsü nungi mepilatsüla.

Arogo nung tenyaba mapa, putir mapa aser tenzükba mapa (the threefold ministry of the ekklesia: apostolate, priesthood and servanthood/diaconate) ajakji Yisui tenyar ka ama, putir ka ama, aser kilir ka ama tenzükba mapa nung amendaka lir.

Temeim agi anebalua sama-a aliba santem kümzüksang aser lenmang aibelena aoba santem tim lenmangi anir arua santem müsüba aser anükba, tenzükba mapa sayutsü asoshi Yisui pa sannüker tajung ta atishia sayu. Yisui sannüker tulubaji lir (Ibri 13:20; Yohan 10:1-18). Paji Sannüker tongtibaji lir (1 Peter 5:4).

Arogo nung tenzükba mapaji kiliri tenzükba mapa ama lir kechiyong Yisui kilir ka ama tenzük (Mark 10:45; Lk 22:27; Yohan 13:1-11, 14ff.; Filipi 2:7). Khrista mang ama arogoji Yisui kechi inyak iba amaji maneni inyaktsüla aser lenisüba aser tenzükba ajak nung Yisui jakla ajizüka inyaktsüla. Tenzükba mapaji (diaconia) alar mapa lir. Pauli pa tenzükba mapaji alar mapa amai anagatet. Anungji pa 'Khrista Yisui lar' ta aiben zulu (Rom 1:1; Gal 1:10; Filipi 1:1; Tit 1:1). Arogo nung tenzükba mapaji kilir aser alar mapa ta kodang angateter iba nungji konang, tetoshi, tenügsang doktsür; pei taküm, rongsen, sempet, mapang ajak tenla agüja Khristai timtem touthi ajuruba ama tenzüktsü akhanger (Mark 10:38; Kolosi 1:24; Filipi 3:10). Iba kilir aser alar ama tenzükba mapa inyakba jagi ochimashi mapa, tashiyim inyakyim, tangar ajemoka yutsüba yamala temenen mapatem anema Tsüngrem tenung nung takutsüng adoka nokdakba lir. Ibaji ajanga temeim, yimjung, tesünep, ajak asoshi saku temeten, aser ochiba yimli aser lenisüba bener arur.

(Maneni asung adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Catholic Arogoi Canada nung lisopurtem dang tatok meshir



Canada kübok Kamloop nung taoba mapang Arogoi ketdangsüba Indian Residential School kima lisopurtemi akhidang azünger kaketshir asürtem nem akhüm agütsüba noksa nung angur.

September 25, 2021: Akhidang Canada nung Arogotemi ketdangsüba residential school tem nung tanurtem dak mejungi benshia aruba atema Hokolbarnü (September 24) Catholic Arogoi Canada nung lisopurtem dang tatok meshiogo.

Ajisüaka lisopur lenirtemi iba atemaji Pope Francis-i tatok meshitsüla, ta akhanger.

"Onok, Catholic Bishops of Canada-i kanga sasa bilemer aser tatok meshir," ta parnoki sangdong ka ajanga metetdaksü.

Akhidang Arogotemi ketdangsüba residential school tem nung azünger tanur jenti aremba leper asem tawa anguba sülen mangatetep tulu adoka liasü. Tesem asem nungji tasü mang 1,200 shi rema aliba bushiteta liasü.

1980s mapang nungi 1990s mapang tashi nung Canada tesem balala nung residential school 139 nung Indian, Metis aser Inuit tanur 150,000 shi zünga liasü aser parnokji ita mesüra küm aika tsüraburtem den pilar liasü.

September 30 nü Canada nungeri tang mezü ng National Day for Truth & Reconciliation amongtsü lia Arogoi lisopurtem dang tatok meshir.

Taküm küm tomlen Canada Ato kilonser, Justin Trudeau-i, asen linüki inyakba mapatemji ajanga aoksar aser aaker, ta shia pa leniba nung samaba mesüra asüba tanurtem nem akhüm agütsüba sentong ka agia liasü.

Putirtemi sangdong ka ajanga, tesayurtem aser tongti tesayurtem ket nung lisopur kaketshirtem aika shi aser tanela nung kanga timtema arubaji onok angateter, ta metetdaksü.

"Catholic tamangertem aser Arogoi aikati iba inyakim nungji

shilem agiogo, koba ajanga lisopurtem oshi, sobaliba aser tamang jenjang raksatsü," ta sangdong nung shia lir.

"Akhidang nungi tenzüka tanü tashi lisopurtem timtema aruba aser mamatoktetbaji onoki angateter," ta putirtemisa metetdaksü.

Ano külen putirtemi lisopurtemi mepishiba ama documents mesüra records agütsüba ajanga mejangjaba lepertem nung aliba maitsütem jangjaba nung yaritsü, ta metetdaksü.

Arogotemi ketdangsüba residential school tem nung tanurtem dak mejungi benshia aruba atema Pope Francis-i tatok meshitsüla, ta lisopur lenirtem aser lokti tentet lenirtemi akhanger. Canada Ato kilonser, Trudeau-ia Pope Francis dang Canada nunger li nungi nai lisopurtem dang tatok meshitsüla, ta takhangba agütsüogo.

Taküm December ita nung Canada nunger lisopurtem telok ka Vatican-i oa Pope Francis ajurutsü sentong renema lir.

Putirtemisa, lisopurtemi Pope Francis ajuruba maparen nung yariteptsü atema Vatican aser lisopur lenirtem den amalitepa inyaksü, ta metetdaksüogo.

Taküm Canada nung taoba mapang Khristan school-Marieval Indian Residential School nunga tasü mang noklang aika aremba nguteta liasü.

Canada kübok Kamloops nung tama Khristan residential school ka nung tanur 215 tasü mang aremba jangjaba sülen maneni Canada nungsa Catholic residential school ka nunga school tanur 752 aremba osang jangja.

Marieval school ya Regina, Saskatchewan nungi mile 85 shi pilar lir aser iba school ya 1898

küm lapoka liasü. Iba school ya Catholic missionary temi ketdangsüba reprang aser 1968 küm tashi federal sorkari senotsü agi yaria liasü. Tesüsa sorkari iba school repranga aruba sülen 1987 küm Cowessess First Nation nem agüja liasü. Iba school ya 1997 küm shibang aser 1999 küm school ki bendoka liasü.

Osang angazükba agi, tesüba mapang lepertem nungji temaitsü yüja liasü saka 1960 küm Catholic Arogo nungi züngsemtemi leper lungji agien.

Osangbenertem senden ka nung jembidang Federation of Sovereign Indigenous Nations tongti, Bobby Cameron-i, "Kamloops aser Marieval nung lepertem angubaji ajanga ano leper aika alitsü ta amanger. Item otsüji jungkai adoktsü. Tai tokteptsü atema Canada-i onok den yariteptsüla. Ozü nüburtemi tatok meshidaksünüba dang masü saka temeim-a sayudaktsüner. Onoki ochi temeden angutsü temsüa lir," ta metetdaksü.

Iba tatalokba atema Pope-i tatok meshitsüla, sabang ka nungi tatok meshitsüla, ta shia Cameron-i sorkar dang parnok den yariteptsü aser residential school ajak indang records metetdaksütsü mepishiogo.

Residential Schools ya 1890 küm nungi 1969 tsü ngda lapoka liasü. Iba mapang nungji sorkari Catholic Arogo dang nungi iba school meshizüka ketdangsüba sülen 1978 küm shibang.

Aso 19buba mapang nungi tenzüka 1970s tashi nung Canada nung First Nations tanur 150,000 shi kangshia linüki yariba Khristan school tem nung zü ngdaksü. Iba mapang nungji school tem nung tanurtem dak tim mesüi benshiba tatalokba aika liasü.

ANO GO ABEN TSÜNGREM DEN

KATI KA DEN PUTEPAANG

"Kü pelaba süngdaksütsü asoshi putepa liang...telungjem liang, aser kati ka den putepaang," Filipi 2:2

Iba lai nung ya, Paul-i asenok dang Khrista nung adianutem den temeim mnung sendaktepa alitsü ajungshir. Pai longjemtsü aser putepa alitsü sayur. Asenok ajaki iba onük ya khen aroka bilemdangtsüala. Yisu-i pa alima nung alidang kilir ama alitsü shimtet aser asenok Pa den pelatepa sendaktepa alitsü atema Pai asenok asoshi tematiba tenla agütsü. "Asenok temang tetenzük aser tabensadaksüba Yisu, shibai pei jkdang aliba tepela asoshi maksü arema kangki timtem aremzüka, Tsü ngrem chuba menden tajichilen amen," Ibr 12:2.

Puteptsüba tashiji asenoki Tsü ngrem dang meshidi kechiaser Pai aji meimer aser asenok dang nungi iba tashi angabaji yimlar. Yisu Khrista alima nung alidang ajak den kasa alitsü sayu. Yisu-ibo par nütsü ng ter ana tetsü ng shitoktsü. Putepa tashi tulutiba kaji aseni ajemalutsüla aser Tsü ngrem temeimji ochi agi metettsüla. Joe Stowell-i yamai ashir, Meilongibo nai tangar den junga otetba jakla ne dak ngua na kanga sü ngmangtsü."

SARASADEM

O Tsü ngrem, Külemi ne dak pelaa alitsü, Ne temeim tashi agüjangma. Amen

2022 küm Khristantem atema social media sabang ka tenzüksü

September 25, 2021: 2022 küm Khristantem atema social media sabang tasen ka tenzüksü aser iba nungji alima tesem ajaklen tamangertem atema Khristan yimsü dak sendakba ocettem dang lemsateptsü, ta osang ka ajanga metetdaksü.

Social media platform tasenba nungjaji 'FaithMeet' asütsü aser iba sabang ya Godwin Rose Samuel-i tenzüker.

Tawa interview ka nung jembidang Samuel-i, "Facebook, Twitter aser Instagram ama sabangtem nung Khristan ocettem atema maongka peria magütsür, ibayongji ni Khristantem atema sabang tasen ka tenzüksü apitet," ta metetdaksü.

"Khristantem Khristan masüba mesüra secular dak sendakba osettem nung mapang jenti indoker aser apps balala nung Khristan ocet bushitsü meranger," ta paisa metetdaksü.

Ibayongji Samuel-i FaithMeet sabang tenzüksü apitet, koba ajanga tamangertem Tsü ngrem dak taliba rangloktettsü.

"Iba dak alia iba sabang

ajanga Khrista dak mamangertema Khrista dangi anir arutettsü ta ni imlar," ta paisa metetdaksü.

"Apps aika nung Khristan dak sendaka maliba ocet aika adoktsür. Tang Facebook, YouTube aser Instagram sabangtem kasa ama lir, kechiyong item apps nungji ocettem, videos aser noksatem lir. Anungji tangbo nisungtemi tanga apps kangabo merepranger," ta pai ashi.

FaithMeet app nungjia Khristantem Khristan ocettem angutsü, item rongnung noksa, kentenmenü aser videos densema lir. Kasa app nungji Khristantem Arogo balala aser ministry balala nem tenla aser ter-shilem agütsütettsü.

Iba sabang nungjisa sensaksemtsü atema feature ka alitsü, kong tamangertem tsü ngda kati ka ajungshiteptettsü aser Tsü ngrem O lemsateptettsü.

FaithMeet ya tim masüba nung mamshitsü aser Tsü ngrem tiyongtsü sü dakdaksüba sabang ka asütsü atema community standards aser guidelines alitsü; iba App ya sangküm tenzüksü, ta Samuel-isa metetdaksü.

India nung medical college 600 bosa nungdaker: Nitin Gadkari



September 25, 2021 nü Indira Gandhi Indoor Stadium, New Delhi nung 'National Cooperation Conference' aliba mapang nung Union Home Minister, Amit Shah nem sempet agütsüba noksa nung angur.

Pune, Rongjui/September 25 (Agencies):

Honibarnü Union Minister, Nitin Gadkari-i, asen linük nung medical college tajemba agi 600 bosa nungdaker, AIIMS ama hospital 50 aser super-specialty hospital 200 bosa nungdaker, ta metetdaksü.

Paisa, infrastructure terenlok sector nung public-private partnership ama healthcare aser shisaliok sectors nunga public-private partnership yanglutsü nungdak, ta ashi.

Maharashtra nung Satara district kübok Karad yimti nung coronavirus wara anema rarartem nem tetushi agütsüba sentong ka nung jembidang Road Transport & Highways Minister, Gadkari-i, medical facilities amenoktsü atema

cooperative sector-i inyaksüla, ta ashi.

"Tamen Ato kilonser, Narendra Modi den shisa lemsatepba mapang nung ni pa dang linük nung ventilators peria maliba indang lemsatepa liasü.

Pai kü dang linük nung ventilators kwi lir, ta asungdang, ibaji langzüa ni pa dang ventilators lakh 2.5 shi lir ta ashi, ajisüaka pai kü dang linük nung coronavirus mezüng prokba mapang nungbo ventilator 13,000 dang liasü, ta metetdaksü," ta Union Minister-isa ashi.

"Iba mapang nungjibo hospital nung oxygen, yipten aser tanga medical facilities ishika dang liasü, saka doctor tem, paramedical aser nurse temi teyari kanga agütsüogo,

ibayongji ni parnok nem tenünsang agütsür," ta pai ashi.

Sorkari lapokba hospitals dak alia cooperative aser nija sectors indang hospital temi inyakba mapatem atema tenünsang agütsür, ta pai ashi.

"Infrastructure terenlok nung public-private partnership nung inyakba ama health care aser shisaliok sectors nunga inyaksüla. Linük nung medical college tajemba agi 600 bosa nungdaker, AIIMS ama hospital 50 aser super-specialty hospital 200 bosa nungdaker. Medical aser shisaliok sectors nung inyakba organizations nem teyari agütsüsa atema sorkari bilemdar," ta paisa metetdaksü.

Iba dak alia jila ajak nung veterinary hospital kakabosa nungdaker, ta paisa shisem.

Kanhaiya Kumar aser Jignesh Mevani nati Congress nung adentsü

New Delhi, September 25 (Agencies):

Taoba mapang Jawarharlal Nehru University (JNU) nung lenir, Kanhaiya Kumar aser Dalit nung lenir Jignesh Mevani nati September 28 nü Congress party nung adentsü, ta party osang ka ajanga metetdaksü.

Tan ita tetenzüklen Kanhaiya Kumar-i Congress lenir, Rahul Gandhi ajuruba sülen nisung aikati Kumar-i Congress nung adentsüa akok, ta bilema liasü.

Lenir ana ya September 27 nü- Shaheed Bhagat Singh asoba anogomong nung Congress party nung adentsü sentong liasü, saka kasa anogo nung aluyimertemi linük tesem ajunglen longkak aittsü ayongzüka agi anogo ka

atsülangogo.

Lenir ana Congress party nung adenba sentong nungji Rahul Gandhi aser Congress lenir, Hardik Patel na adentsü, ta osang angazüker.

Kanhaiya Kumar ya Communist Party of India (CPI) nung züngsem ka liasü. JNU nung azüngba mapang nungi tenzüka pa ya o kanga tsüngro-songa jembir ka lir. Pai yimtenren nung ajemokba sülen 2019 küm Lok Sabha elections nung pai Begusarai menden nung nungi BJP lenir Giriraj Singh den toktepa liasü.

Iba election nung Kanhaiya Kumar-i takok mangu aser kobi melii Bihar nung assembly election agitsü lia pai Congress party nung adentsü.

Ano külen Jignesh Mevani

ya Dalit nung lenir ka lir aser pa ya Gujarat nung Vadgam menden nungi Independent MLA lir.

Honibarnü osangbenertem den jembidang pai, September 28 nü Kanhaiya Kumar tenaprong Congress nung adentsü, ta metetdaksüogo.

Sangküm Gujarat nunga assembly election agitsü lia Jignesh-i Congress nung adentsü.

Gujarat Congress Tir, Hardik Patel-i, "Linük terenlok atema inyaksü melunger lanur lenirtem ajak agizüktsü onoki melunga lir. Ibaji ajanga Congress party tashi itdaksütsü aser (Mahatma) Gandhi, Sardar (Patel) aser (Jawahar)l) Nehru nung tangatetba beshitsü," ta metetdaksü.



September 25, 2021 nü Chandigarh nung Chandigarh Pradesh Congress Committee-i state sorkar anema longkak aittang police-i tzü khaloktsüba noksa nung angur.

Kiralongratsü atema Afghanistan nung li mamshitsüla: India-US

New Delhi, Rongjui/September 25 (Agencies):

India aser US nati Taliban dang nenoki meimchir temeden atema inyaksü, tetsürtem aser minorities nem temeden agütsütsü aser kiralongratsü atema Afghan nung li mamshidaksütsü atema nangzüka ama shidak inyaksüla, ta nenshia metetdaksüogo.

Hokolbarnü Washington nung Ato kilonser Modi aser US Tir, Joe Biden na senden amenba sülen lenir anati külem sangdong ka ajanga ibaji metetdakja liasü.

Lenir anatisa Afghanistan nung kiralongra anema raratsüji tongtibang, ta bangjemogo.

Ato kilonser Modi aser US Tir Biden natisa, Taliban-i UNSC Resolution 2593 (2021) nung aliba ama inyaksüla; linük kar nung kiralongratsü, amokmerentsü, kiralongrartem jenokdaksütsü mesüra traning agitsü atema Afghan nung li mamshidaksütsüla, ta metetdaksü.

Lenir anatisa Taliban dang

meimchir temeim mapa inyaksü atema UN, UN specialised agencies aser partners den melungtet telok ajak sadem sadema inyakdaksütsü metetdaksü.

Afghan nung ajak tesünep nung alitsü atema India aser US nati maneni partner linüktem den longjemer inyaksü bangjemogo.

Taküm May 1 nungi tenzüka US sepaitemi Afghanistan toktsür aoba sülen August 15 tashi nungbo Taliban-i linük yimtiba, Kabul densema yimti timbaka agiadok.

Taliban teloki sorkar nung ajak dendaksütsü nangzüka liasü saka Taliban-i Cabinet nung tetsürtembo ka danga mezüngok. Cabinet nung shimoker timbaka lisopur Pashtuns lir aser Taliban sepaitem timbaka parnok lir.

Taliban-isa mapa aser shisaliok lenla densema lenla aika nung tetsürtem temeden nokdangogo.

Cabinet nungjisa kiralongrar aika lir, ibayongji linüka aikati Taliban sorkar magizükteter.

Cyclone Gulab agi Odisha aser Andhra na kongshitsüa akok: IMD



New Delhi, September 25 (Agencies):

Honibarnü Kolkata nung Indian Metreological Department (IMD)-i, Bay of Bengal nung yipru ka kümtetdar aser taruba ghonda 12 tsüngda ibaji yipru tesashi akümtsü, ta tekümdangtsü osang ka metetdaksüogo.

IMD-isa, Gulab ta ajaba yipru tesashi jagi Odisha aser Andhra Pradesh nung tesem aika kongshitsüa akok, ta shia state ana nem 'yellow alert' metetdaksüogo.

IMD-i, northeast aser eastcentral Bay of Bengal nung yipru ka kümtetdar aser tesüiba ghonda trok tsüngda ibaji ghonda ka nung kilometer 12 kera anüolen tsütsüi ondar; tang iba yipruji tesashiba küma north aser eastcentral Bay of Bengal nung lir; September 25 anepdang 5:30 ako nung iba yipruji Gopalpur (Odisha) nungi kilometer 510 shi pilar liasü aser

Kalingapatnam (Andhra Pradesh) nungia kilometer 590 shi pilar liasü, ta metetdaksü.

Taruba ghonda 12 tsüngda iba yipruji Cyclonic yipru ka akümtsü aser maneni anüolen tsütsüi ona September 26 nikongdang north Andhra Pradesh aser south Odisha t z ü y i m k ü m l e n Vishakhapatnam aser Gopalpur tsüngda süitsüa akok, ta IMD-isa metetdaksü.

IMD-i tekümdangtsü osang metetdaksüba sülen NDRF team 15 West Bengal nung tzüyimkümlen aliba district temi yokogo aser team pezü Kolkata-i yokogo.

Ano September 27 nüa Northeast aser East Central Bay of Bengal nung yipru tesashi ka kümtettsüa akok aser ghonda 24 tsüngda ano tesashiba akümtsü aser September 29 nü West Bengal tzüyimkümlen atongtsüa akok, ta IMD-isa metetdaksüogo.

UN senden nung Myanmar-i o mejembitsü

New York, Rongjui/Septemeber 25 (Agencies): Myanmar nungi ketdangsür kati danga U.N. General Assembly senden nung o mejembitsü, ta U.N. otongdari Hokolbarnü metetdaksü. Myanmar nung military-i sorkar atsüngtokba sülen linük nungi UN menden atema tang telok ana tsüngda tetoktepdak lir.

Kasa mapang nung Taliba-i taoba ita linük atsüngba sülen Afghanistan indang UN menden atema tetoktepdak lir. Taoba Afghanistan sorkar indang ambassador-i Hombarnü jembitsü renema lir.

"Myanmar tenüng nung ketdangsür kati danga o mejembitsü," ta UN otongdar Stephane Dujarric-i ashi.

Aung San Suu Kyi-i aniba sorkari shimba Myanmar nungi UN dangi Ambassador Kyaw Moe Tun-i Hombarnü General Assembly nung o jembitsü imlaa liasü.

Ajisüaka diplomats-i ashiba agi, Kyaw Moe Tun-i iba senden nung o mejebira pa

tang atemabo Myanmar ambassador ama agizüka atatsü atema China, Russia aser United States tangatetep ka dangi aruogo aser Moscow aser Beijing nati iba anema menokdaksü nangzükogo.

"Ni ojembitsüpur rongnungi atsünginogo aser ni general debate nung mejembitsü," ta Kyaw Moe Tun-i Reuters dang ashiba den pai Russia, China aser United States densema aliba U.N. credentials committee züngsemtem kar tsüngda tangatetep ka dangi aruba indang pai jangjaa lir, ta ashi.

Myanmar nung junta-i military lenir tejen Aung Thurein U.N. envoy asütsü atema benokogo aser kasa mapang nung Kyaw Moe Tun-ia, U.N. accreditation renew asütsü atema benokogo.

Dujarric-isa, "tang tashi nungbo Hombarnü o jembitsüpurtem rongnung Afghanistan nungi Ghulam M. Isaczai züngoksema lir," ta ashi. Isaczai ya tang U.N. ambassador lir, shiba Taliban-i atsüngtokba Afghanistan

sorkari shimba lir.

Taliban Foreign Minister Amir Khan Muttaqi-i Hombarnü alima kin balala lenirtem adenshia aliba mapang United Nations nung ojembitsü atema temelaba meshi aser U.N. dangi Afghanistan ambassador asütsü atema par telok nungi Doha nung amenoker aliba otongdar Suhail Shaheen tenüng benok.

U.N. accreditation ken o ya züngsem teku agi kümetetba committee kati achayanger, kong United States, China aser Russia densema lir. Yimya agiba committee ya October mesera Novmber ita ajuruteper, anungji taküm high-level General Assembly senden nung Muttaqi nem o jembidaksütsü atema mapang shidak nung telemtetba ka agitettsü.

General Assembly temzüng ozüng kübok Afghanistan aser Myanmar dak sendakba nung credentials committee-i telemtetba ka magi tashi Afghanistan aser Myanmar nungi Isaczai aser Kyaw Moe Tun nati maneni ambassador mapa bena atatsü.

Hong Kong Alliance inyaksangshi anentsü telemtetba agi

Hong Kong, Rongjui/September 25 (Agencies): Hong Kong pro-democracy telok shironki Tiananmen Square lendong nung asürtem bilemtetba sentong küm semer dak tema ayongzüka aruogo, parnoki Honibarnü iba telok loksatsü telemtetba agiogo. China-i tashiyim amshia parnok amokseptsü merangba mapang ka nung iba telemtetba agiogo.

Hong Kong Alliance ya yimti indang taoba mapang political plurality indang temaitsü ka liasü aser iba telok inyaksangshi masütsü atema telemtetba agiba ajanga China-i kanga kara iba yimti tashiyim agi azüokba sayur.

"Iba lokti inyaksangshi masütsü telemtetba agiba ya kanga tesasatsüka," ta alliance züngsem Tsang Kin-shing-i ashi. Küm 32 sülen iba telok loksatsü atema lenirtemi telemtetba agiogo.

"Sorkari lokti tentettem nokdangtsü atema takokba tashi tashiyim amshir," ta pai ashi.

Yimti nung democracy movement nung shilem agiba atema alliance lenirtem aika tepuokdaki yokogo. Iba ita tetenzüklen police temi national security temzüng ozüng kübok lenir tejen asem aija liasü.

Kasa hopta ketdangsürtemi 1989 Tiananmen Square nung Beijing-i tashiyim amshia nisungtem tepsetba bilemtettsü atema iba teloki lapokba museum ka meita ao aser shibangtsü. Ketdangsürtemi musem nung aliba iba tatalokba indang exhibits, memorabilia aser noksatem bener ao.

Police-isa, iba telok dang parnok indang website aser social media sabangtem shibangtsü tetuyuba agütsü aser iba telok company ama züngoksema aliba agintsütsü nangzüka liasü.

Tepuokdak nungi shiti ka ajanga alliance lenir Chow Hang-tung-i par telok dang temulung mademi maneni inyaksü ajungshia liasü.

"Ni Hong Kong Alliance tamangba alima dang sayuner aser küm 32 tashi inyaksangshia aruba meneni inyakyonga odaktsüner," ta Chow-i shiti ka nung ashi, koba la indang Facebook page

nung upload süja liasü.

Ajisüaka tepuokdak aliba lenir ana; Lee Cheuk-yan aser Albert Ho nati iba telok loksatsü atema mulunga aliba shiti nung sign sütsü.

2019 küm Hong Kong nung azütokshia longkak aitba sentong tulu ka ayongzüka agi. Iba dak sendakba nung China-i telangzüba tesashi agütsü aser national security law tasen ka benok. Iba temzüng ozüng ajanga China-i mulungba ama minyakertem linük anemertem kümtsür aser tepuokdaki yoker.

Iba temzüng ozüng kübok nisung 90 dak tema aitsüogo aser unions aser political party tem densema lokti tentet aika inyaksangshi anenogo.

Yimti nung Beijing indang ketdangsürtemi tawa ashiba agi, one-party dictatorship tembangdaksütsü atema nokdakertejii shidakba tsükchirtem lir.

Taküm küm tetenzüklen Hong Kong Alliance dang parnok national security unit-i bushisüngdangdar ta ashi aser parnok züngsemtem indang osang tejangja aser kuli kaketter agütsütsü atema ozüng agütsü.

Opposition telok tangatem ama masü police tetuyuba sülen tashi angaa manidaki alliance-i iba anema nokdak.

Tongtibang lenirtem aika obendangertem lir aser parnoki iba tetuyuba ya temzüng ozüng alema lir ta shia police den toktep.

Buishesüngdang den parnoki teka amteper minyaktsü ta alliance-i jangja jangja metetdaksüba sülen police temi lenirtem anema ken o balala benok tenzük.

Ketdangsürtemi Hong Kong Alliance ya Patriotic Democratic Movements of China pusemer ama züngshir. Iba telok ya Beijing nung democracy aser anti-corruption rally tem ayongzüka agiba kaketshirtem pusemstsü atema 1989 küm May ita tentet.

Ita ka sülen China nung lenirtemi tank aser sepaitem yoka iba movment ya Tiananmen Square nung ajemrepa toktsü. Iba tatalokba indang record ya kanga kümdanga asadanga arudar aser nüburttem nem memetdaksütsü atema aginogo.

Huawei CFO Meng Wanzhou chiokogo

Ottawa, Rongjui/September 25 (Agencies): Huawei indang chief financial officer (CFO) Meng Wanzhou shiba 2018 küm December ita nungi Canada nung sota liasü, la Hokolbarnü China-i ogo. American department of justice-i la den tenangzüktepdak ka yangluba sülen United States nung extradition ken o ka nung aija aliba dak sendakba nung obendanger kati taitok agütsüba sülen la China-i meyipa ao.

Canada nung Meng Wanzhou apuba sülen taoba mapang diplomat ka densema Canada nung ana China nung pua yua aliba chiokba osanga Canada Ato Kilonser Justin Trudeau-i sangdonga liasü.

Huawei ngutetsang Ren

Zhengfei'er jala Meng Brooklyn, New York nung amenoka aliba Federal district court ka matsüngda virtual nokdaka liasü. US justice department sangdong ka ajanga ashiba agi, lai deferred prosecution agreement (DPA) ka agizükogo aser la bank dak sendakba nung ochi mashi inyayim nung densemstsü aliba atema aija aliba obendangtsü atema jaok.

Nikongtsütsü tashi nung British Columbia Supreme Court associate chief justice Heather Holmes-i, extradition dak sendakba nung Meng Wanzhou anema ken o benoka aliba agintsü.

Iba sülen Canada indang department of justice-i la linük toktsür otettsü ta osang agütsü.

Iba osang agütsüba sülen

ghonda ka shi nung la special Air China flight ka nung mener China kübok Shenzhen yimti-i ao.

Kasa mapang nung Hokolbar nikongtsütsü Justin Trudeau-i, China nung tepuokdak aliba Canada nung Michael Spavor aser Michael Kovrig nata China nungi meyipaarudar ta osang agütsü.

August 11 nü shishilembar Spavor ya itangiter dak sendakba nung aija China nung okadak kati küm 11 tepuokdak ayutsü obendang agütsü.

Meng Wanzhou aser Spavor o Kovrig na dak sendakba ken o nung ajemdaker Ottawa aser China na tsüngda tesendaktep mejungi aküm aser Trudeau-i Canda nung ana apuba ya "hostage diplomacy" ta ashi.



September 25, 2021 nü Washington nung Ato kilonser, Narendra Modi, US Tir, Joe Biden, Australia Ato kilonser, Scott Morrison aser Japan Ato kilonser, Yoshihide Suga nung Quad lenirtem senden nung adenba noksa nung angur.

Durand Cup: Bengaluru FC semifinale iogo



Wungngayam Muirang-i Bengaluru FC atema goal idaktsür sülen pungdena pelaba yangi noksa nung angur.

Kolkata, Rongjui/September 25, 2021 (Agencies): Honibarnü, Vivekananda Yuba Bharati Krirangan (VYBK) stadium kübok Durand Cup quarter final nung, Bengaluru FC aser Army Green na kanga toktepa asayaba sülen, Bengaluru puri Army Green madak goal 3-2 agi takok ngua semifinal tongogo.

Taruba Bodhbarnü, Bengaluru FC-i FC Goa telok den semi-final tanabuba asayatsü.

Iba asayamung quarter final tatembuba nung, Bengaluru FC atema, Wungngayam Muirang (20th minute), Leon Augustine (47th) aser Namgyal Bhutia

(74th) nungeri goal ka ka idaktsü. Kasa asaya nung, Army Green atema Lallawmkima (9th) aser Vibin T V (89th) nati goal ka ka inokja liasü.

Iba asaya tenzüker, Army teloki Bengaluru pur amokbanga liasü aser tatsüka dang lir parnoki goal ka inoktsütsü maongka angu, kong minute 9buba nung Lallawmkima-i goal ka inokja, Army Green pur goal 1-0 agi Bengaluru tejakdang kümadak.

Ajisüaka, BFC-i kanga dang süngjema asaya yimya/ tasa meraksai asaya aser parnoki free kick ka metsütsü maongka ngua minute 20buba

Muirang-i Army Green indang keeper Sarath adena iba goal metsüloksü.

Telok anaprongla goal 1-1 idaktsür lia mezüing half nung mapang talila apuloktsür asayadang, Leon Augustine-i BFC atema goal tanabuba idaktsü aser Bengaluru pur goal 2-1 agi Army Green tejakdang ser mezüing half asaya tembang.

Break sülen, tanabuba half nung, Bengaluru FC pur goal 3-1 akümtsü aser goal talila ana agi iba asaya akoktsü teimla nung, minute 74buba nung Namgyal Bhutia-i BFC atema goal tasembuba bendenloksü.

Army Green nungi Dip Majumdar aser Deepak Singh napronglai goal idaktsütsü maongka angu aser Bengaluru pur koktetta asayatsü merandang, saka Blues' (Bengaluru FC) pur defence tsütsü kanga akangashia asayaba yong parnoki Army Green indang tongtibang goal aika nokdangteta asaya.

Asaya atemtsü lia, Army Green-i penalty ka metsütsü maongka tajung angu aser minute 89buba nung Vibin-i telok atema goal tanabuba idaktsü.

Delhi Capitals puri run 33 agi Rajasthan Royals kokogo

Dubai, Rongjui/September 25, 2021 (Agencies): Tang asaya aliba Indian Premier League (IPL) 2021 nung, Delhi Capitals team-i maneni junga asaya arudar aser Honibarnü Abu Dhabi kübok ayongba IPL indang asaya 36 nung Rishabh Pant'er teloki run 33 agi Rajasthan Royals kokogo.

Iba asaya nung, Delhi Capitals-i over 20 nung run 154 shi yanglutet, saka Delhi bowler temi over 20 nung Rajasthan nem run 121 dang agütsü aser wicket trok out sütsü. DC-i takok anguba yong parnoki tanaben IPL point table nung temaba jenjang tongtetogo. Rajasthan Royals atema captain, Sanju Samson-i kanga meranga asaya, kong pai half century yanglutet saka külem asayartemi (batsman) run aika meyanglutet. Iba season nung, RR pur pungoben tamakok angur asütsü.

Samson-i 6' ka aser 4' ti densema run 70 (not out) yanglua liasü. RR nungi

opener Liam Livingstone aser Yashasvi Jaiswal naprongla mezüing over ana nung tukadok. Avesh Khan-i mezüing over nung Livingstone out sütsü aser tanabuba over nung Anrich Nortje-i Jaiswal out sütsü.

DC nungi spin bowler takotet R Ashwin-i RR batsman David Miller (7) out süja liasü. Taküm season tenzüker asaya trokbuba nung Ashwin-i mezüing wicket out sütsü. Iba den külemi pai T20 nung wicket 250 agir asütsü.

Ano, Rajasthan Royals pur teimla raksatsütsüsa Delhi Capitals nungi Kagiso Rabada aser Axar Patel nati Mahipal Lomror (19) aser Riyan Parag (2) naprongla atonga out sütsü.

Iba asaya mezüing innings nung, Rajasthan Royals-i over 20 nung Capitals nem run 154 agütsü aser wicket 6 agi. Rajasthan Royals atema bowler Mustafizur Rahman (2/22), Chetan Sakariya (2/33) aser Rahul Tewatia (1/17) nungeri junga asayaogo.

Emma Raducanu aser coach Andrew Richardson na pilaogo

New Delhi, Rongjui/September 25, 2021 (Agencies): Qualifier ka ama US Open takok anguba sülen, hopta ana majungdang, British tsür Emma Raducanu-i coach Andrew Richardson den pilaogo.

Taoba mapang Davis Cup asayamung nung asayar, Andrew Richardson-i küm ana atema youth level nung Emma Raducanu indang coach ama inyaka aru aser US Open asayamung matongdang, mapang tatsüka atema taküm July nung pai tanaben Emma indang coach inyaka liasü.

Hokolbarnü, 'homecoming' sentong ka nung dener sülen, Emma-i ashiba agi, WTA Tour nung takok timba angutsü tebilemba lir.

Iba sentong nung, Emma-i tennis fan ka, Duchess of Cambridge den ajurutep aser la den külemi tennis asaya liasü.

"Külem team ka den ajangshia arurbatem tangar kar den lemsateptsü aser iba indang jembitsü tasak. Ajisüaka, Tour tsütsü tajangshiba jenti alir aser takotet nübu ka nungdaker," ta Raducanu-i ashi.

"Ni atema ibaji kanga dang nungdakba maparen ka lir ta nibo bilemer. Iba den külemi, nia asayar tasen ka asünung, ni nungitta yaritsü aser len anitsü asoshi, iba wadang nung

tajangshiba jenti alir aser takotet nübu ka kanga nungdaker," ta lai ashi.

Arishi küm 18 tain Raducanu-i qualifier ka ama set ka nungdanga tamakok mengui US Open tetsür kija final takok anguba mapang, alima ajunga nung saisaponger aser asaya sapurtem süngmandaktsüogo.

Lai iba asayamung takok anguba den külemi, küm 44 nung Grand Slam takok angur British tsür rongnung la mezüing aküm.

Taoba mapang Britain atema Richardson-i Davis Cup nung shilem agiogo, saka WTA Tour tsütsü pa dak tajangshiba jenti mali.

"Asayamung metenzükdang, trial atema, Andrew ya coach tajung ka alitsü ni bilem, ibayongji künaprongla America-i ao, saka ni kodanga US Open takok angutsü ta bilema meliasü aser asaya aoba mapang final tashi tongteta ni iba asayamung takok angu; aser tang ni rank no.22 nung lir, koba ni atema kanga dang tulu," ta Raducanu-i ashi.

Raducanu-i ashiba agi, Richardson melena coach ka shimtsü asoshi nübu tejangja ka kü molung nungbo mali aser iba season matem tashi coach ka shimtsü asoshi telemtetba ka agitsü meimlar.

4buba Dimapur District Inter- Club Badminton tournament tebangogo



Dimapur Badminton Club-i 4buba Dimapur District Inter- Club Badminton asayamung takok ngur sülen, DBC team pur külemi tangokba noksa ka yangi angur.

Dimapur, Rongjui/September 25, 2021 (TYO): Dimapur Multi Sports stadium nung, Dimapur District Badminton Association tawabangba kübok Morning Shuttlers' Club ajanga anogo asem tashi ayongba "4buba Dimapur District Inter- Club Badminton" asayamung Honibarnü tembangogo, kong Dimapur Badminton Club-i iba asayamung takok nguogo.

Anogo asem tashi ayongba asayamung nung Dimapur nungi Badminton Club balalai shilem agia liasü. Iba asayamung lapokba sentong nung Dimapur District Badminton Association president Dr. George Thira tongti tesemdanger liasü aser

asayamung shibangba sentong nung Upa-Lokayukta, Mayang Lima tongti tesemdanger ama aruagi denogo, ta sangdong ajanga metetdaktsü.

MENS DOUBLES(105)

Winner- Alem Pongen & Angam Shaiza (Dimapur Badminton Club)

Runners up- Tali Akang & Yekhvi Achumi (Dimapur Badminton Club)

MENS DOUBLES (50)

Winner- David Achumi & Yehokhe (Elite Badminton Club)

Runners up- Alem Pongen & Angam Shaiza (Dimapur Badminton Club)

MENS DOUBLES (45)

Winner- Dr. Watizulu & Khuozhe (Dimapur Badminton Club)

Runners Up- K. Pikuto Chishi & Kavito Chophy (Elite Badminton Club)

MENS DOUBLES (40)

Winner- Asungba Ao & Vikugha (Dimapur Badminton Club)

Runners Up- Tatong Jamir & Yanger Aier (Shuttlers' United Club)

MENS DOUBLES (35)

Winner- Moanungsang & Tongpang (Shuttlers' United Club)

Runners Up- Hekato & Yongkong (Morning Shuttlers' Club)

MIXED DOUBLES

Winner- K. Pikuto Chishi & Narola Jati (Elite Badminton Club)

Runners Up- Dr. Watizulu & Shekotolu (Dimapur Badminton Club)

MENS DOUBLES

Winner- Riku Khape & Zhakuo (Dimapur Badminton Club)

Runners Up- Imsuren Jamir & Medemnochet (Dimapur Badminton Club)

BILEMDANGANG

"Tachitetsü tila kabo alinungang tangari jembitsür."